

**Regional News Unit AIR Aizawl
Monday, October 14, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Mizoram Truck Driver Association, Mizoram tipper neitu leh khalhtu pawl leh eirawngbawlna gas phurtu Mizoram Indane Driver Welfare te'n vawiin atanga lirthei din tir an tum chu an sut.**
- **November ni 5 a Sinlung Hills Council inthlan chuh tum mi 50 te tan vawiin tlai dar 3 thleng inhnuhdawhna hun hawn a ni.**
- **Sawrkhar laipui chuan Jammu & Kashmir-a President's Rule puan mek chu hlipin sawrkhar thar siamna kawng a hawng.**
- **US-India Strategic Partnership Forum (USISPF) chuan vawiin hian New Delhi-ah India Leadership Summit 2024 a thleng dawn.**



AGITATION

Mizoram Truck Driver Association (MTDA), Mizoram tipper neitu leh khalhtu pawl leh eirawngbawlna gas phurtu Mizoram Indane Driver Welfare te'n vawiin atanga lirthei din tir an tum chu an sut.

Thu dawn danin Aizawl leh Silchar inkar kawngpui dunga Sairang leh Durlui inkar kawng chhe zual pui, lirthei tluk hlauhawm khawpa khuar chhe laite siamthat a nih hma chuan Vawiin atanga tlan rih loh ni se an tih chu an thulh rih a. An thulh chhan hi helai siam mektu contractor hian a chhe zual lai hi ni 2 chhunga siamthat vek a intiam a. Chu bakah Mizoram Truck Owners' Association hruaitute'n chak zawka kawng chhe zual lai siamthat a nih theih na'n zing lam dar 8 leh tlai lam dar 5 inkar chhung kawngpui khar rih tura Police lam nen an inrem avangin nawrh hi an thulh ta rih a ni.

Nawrh an tum chungchang hemi hma hian lirthei khalhtu pawl pathumte hian thuchhuah siamin tun thla ni 5 khan Sairang leh Durlui inkar kawng chhia hi October ni 9 hma a siamtha turin a siam hna thawktu NHIDCL hnuai a contractor-te a hrilh niin an sawi a. October ni 9, Nilaini khan a hmunah an zuk en a, hmasawna duhthusam hmuh tur a awm chuang lo niin an sawi a.

Tunah hian contractor-in ni 2 chhunga a chhe zual lai siam that a intiam avang leh chak zawka hna thawh a nih theihna atana Police lamin chhuna kawng an dan pin dawn avangin an nawrh tum hi an thulh leh ta a ni.

Hetih lai hian Mizoram Truck Owners' Association hruaitute chuan tun dinhmunah Mizoramah tuialhthei hi a lo lut tha thawkhat ni a an hriat thu an sawi a. Heti chunga filling station lama lak tur a awm mang si lo hi a chhan ber ni a lang chu Myanmar leh Bangladesh lama man to uchuak taka hralh a nih vang niin an hria a. Hemi chungchang hi nimin tlai khan Food, Civil Suppliers & Consumer Affairs Minister an sawipui a ni.



FUEL SEIZURE

Inrinni zan dar 9 vel khan Kawnpui Police Station a duty te chuan an thudawn bawhzui-in Kolasib atanga phurh diesel leh petrol phur lirthei pahnih an man a, he thu buatsaih lai thleng hian thubuai ziah luh a la ni lo.

Kawnpui Police duty ten lirthei an man hi a neitu leh khaltu ni bawk Rorelliana, Kawlchaw, Lawngtlai District a cheng leh a khalhtu hnamdang Natab Uddin, Assam te an ni a, hnamdang khalh zawk hi Rorelliana hman hawh ni a hriat a ni.

Heng lirthei pahnih hian Petrol litre 4,620 leh Diesel litre 4,400 an phur a, Diesel leh Petrol hi Kolasib Khuangpuilam a ATS Filling Station atanga Inrinni tlai a an lei niin lirthei khalhtute hian an sawi a. Petrol hi litre khat ah cheng 104 leh pawisa 66 leh Diesel hi litre khatah cheng 86 leh pawisa 95 in ATS Pump atangan an lei niin Rorelliana chuan Kawnpui Police te a hrih a ni.

Thudawna in a sawi dan chuan tunlai hian Lawngtlai leh a chhehvelah tuialhthei a harsa hle a, diesel leh petrol te hi Lawngtlai leh a chhehvel a a mamawhtute hnenah phalna nei lo leh man to taka hralh tur niin thudawna chuan a sawi.



DURGA PUJA

Inrinni khan, Governor Dr. Hari Babu Kambhampati te nupa chuan Aizawl Assam Rifles Temple ah Assam Rifles sipai te leh an chhungte Durga Puja bultanna an hmanpui a,

Governor chuan hlim leh lawm taka he kut hi hmang chho turin duhsakna a hlan a, midangte chawikang tura hmala turin kut hmangtute a chah bawk a ni.

Assam Rifles hian an awmna ramri hrul hmun hrang hrangah Durga Puja hi an lawm chho mek a ni.



SHC WITHDRAWAL

November ni 5 a Sinlung Hills Council inthlan vawi 2-na lo awm tura chuh tum mi 50 te tan vawiin tlai dar 3 thleng inhnudawhna hun hawn a ni.

Hming pelutte inhnudawhna hun tawp vawiin chawhnu dar 3 hnu hian chuh tlang turte chhinchhiahna hman tur (symbol) chinfel a pek an ni ang a, bial hrang hrang 12-a chuhtu turte hming tarchhuah a ni bawk ang.

Inthlan vote thlak ni, November ni 5 khian zing dar 7 atangin vote thlak tan tur a ni a, tlai lam dar 4 thleng vote thlak theihna hun hawn a ni ang. Vote thlak zawha bial hmunpui bera ballot box thlen kim veleh hemi ni vek hian vote chhiar nghal tur a ni a. Inthlan that ngaihna bial emaw polling station emaw a awm chuan a tuk November ni 6-ah vote thlak that a ni ang a, inthlan thatna-a vote tlate hi hemi ni vek hian chhiar nghal tur a ni a. Sinlung Hills Council inthlanna leh a behbawm hi November ni 8 a zawh fel vek turin State Election Commission chuan a ruahman a ni.

Sinlung Hills Council bial 12 a bial 6 hi Aizawl district-ah a awm a, bial 4 chu Saitual district-ah awmin bial 2 chu Kolasib district-ah a awm thung. Aizawl district-a bial 6-ah hian polling station 19 a awm a, chumi zinga polling station 6-te chu venhim zual ngai a puan a ni a.

Saitual district a bial 4-ah polling station 12 awmin hemi zinga 3 chu venhimna uluk zual ngai a puan a ni a. Kolasib district bial 2-ah polling station 7 awmin a vai hian venhimna uluk ngaih zualna a puan a ni.

The Mizoram (Election to Sinlung Hills Council) Rules-in a sawi angin, Sinlung Hills Council General Election-ah hian Ballot Box leh Ballot Paper hmanga inthlan tur a ni a. Inthlanna lo awm turah hian vote nei mi 23,794 an awm a. Vote nei zinga 11,875 hi mipa an ni a, hmeichhe vote nei 11,914 an awm bawka ni.

Puan tawh angin Sinlung Hills Council-a bial 12 inthlanna awm tur chuh tumin mi 50-in an hming an pelut a. Hming pete zawng zawng hian Zirtawpni khan endikna an paltlang vek a. He inthlan lo awm turah hian rorellai ZPM leh Hmar People's Convention (HPC) chuan bial awm zawng zawng hi an chuh dawn a.

An inremsiam danah chuan ZPM-in bial 8 an chuh ang a, HPC-in bial 4 an chuh ang. Congress pawhin bial zawng zawng an chuh a dawn a, MNF chuan HPC (Reformed) nen thawk hovin bial 12 an chuh ang. Hetih lai hian MNF leh Congress party hminga chuh tum hming pelut zingah independent anga chuh an awm bawka. BJP-in bial 2, Khawlian leh Phuaibuang an chuh dawn a, a dang zawng chu independent a chuh an ni.

Sinlung Hills Council hi July ni 5, 2018 atanga hman tan Sinlung Hills Council Act, 2018 dan tlawhchhana din a ni a. November ni 5, 2019 khan inthlanna hmasa ber buatsaih a ni.



DENGUE

Kumin January leh October ni 6 inkar chhung khan Dengue natna hri kai mi 449 hmuhchhuah a ni a, an zinga pakhat hian nunna a chan.

Health & Family Welfare department hotute hnen atanga Akashvani Aizawl-in thu a dawn danin hemi hun chhung hian Dengue vei ni a inringhlel 6,710 awmin an thisen endik sakin an zinga mi 449 chuan an lo vei a ni tih hmuhchhuah a ni a. Dengue hi Aizawl leh Lunglei district-ah a hluar hle a. Aizawl West district-ah sample 2,496 endikin an zinga 168 chuan Dengue an vei a, Aizawl East district-ah sample 1,958 endik zinga 109 in an vei a ni. Lunglei district-ah mi 1,578 sample endik zingah mi 149-in Dengue an vei tih hmuhchhuah a ni bawka. Thla 9 chhunga Dengue vanga thi pakhat hi Aizawl West district ami a ni. Kumin chhunga Dengue vanga nunna chan pakhat tiam hian department-in an chhinchhiah dan chuan Mizoramah Dengue natna thihpui hi mi 8 an awm tawh a ni.

Health department hotute sawi dan chuan Mizorama Dengue natna hmuhchhuah hmasak ber chu kum 2019 khan a ni a. Kum 2020 leh 2021 kha Covid-19 hrileng avanga mipui an inkharkhip hun lai a nih avangin a darh lo tluk a ni a. Kum 2022 atanga hluar leh tanin khami kum khan mi 5-in nunna an chan pah a, kum 2023 khan mi 2 an thi leh bawka. Dengue vanga thite hi Aizawl district ami vek an ni. Nikum kha Mizorama Dengue vei hmuhchhuah tam ber kum a la ni a, mi 12,949 sample lak zinga 2,060-in he natna hri hi an kai a ni.



J&K

Sawrkar laipui chuan Jammu & Kashmir-a President's Rule puan mek chu hlipin sawrkar thar siamna kawng a hawng. Hemi chungchangah hian nimin khan sawrkar chuan thuchhuah a ti chhuak a. National Conference Vice President Omar Abdullah chuan J&K ah hian sawrkar siam a tum mek a. Assembly inthlan neih zawh takah khan National Conference leh Congress tangdun chuan chakna changin seat an la hnem ber a. A wawi hnih nan Omar Abdullah chu Chief Minister a ni leh dawn a. Kum 2019 a Article 379 leh 35-A na paih anih hnu leh state thendarh anih hnua mipui thlan sawrkar ding leh hmasa ber tur a ni.



US-INDIA

US-India Strategic Partnership Forum (USISPF) chuan vawiin hian New Delhi-ah India Leadership Summit 2024 a thleng dawn a. Sumdawnna, supply chains, semiconductor lama sum peipunna, AI leh technology chhuak thar lama thawhhona chungchang ngaihtuah a ni ang. Tunhnaiah Prime Minister Narendra Modia'n hlawhtling taka Quad Leaders' Summit leh UN General Assembly a hman hnuaah a thual nan he Summit hi neih a ni dawn a. Summit neih chungin US leh India te inkara thawhdunna hrang hrang sawihona platform tha tak tak siam a ni ang a. He hunah hian Union Minister te Piyush Goyal, Dharmendra Pradhan leh Jyotiraditya Scindia te pawh thusawi tur zingah an tel a ni.



UNIFIL

Israel Prime Minister Benjamin Netanyahu chuan United Nations chu UNIFIL peacekeeping force te Lebanon Chhim lama awm mekte chu la chhuak turin a ngen. Pu Netanyahu chuan United Nations Interim Force in Lebanon (UNIFIL) te Lebanon chhim lama an awm hian Israel nena nikum atanga indo Hezbollah te mi hrenah an tang thin t a ti a. Kar hmasaa UNIFIL sipai pahnih in Israel sipaite laka hliam an tuar chu pawl atih thu a sawi bawk a ni. UN Peacekeeping Force ten beih an tawh hi UNIFIL chuan a dem thu Zirtawpni khan a lo chhuah tawh a ni.

